

# Novs attestats per la scola populara dal Grischun

■ (cc) L'onn da scola current 2000/01 vegnan duvrads novs attestats en la scola populara dal chantun Grischun. Els resguardan midadas dal canon da roms, ina nova moda da giudicament sco er novas furmas d'organisaziun sin il stgalim superiur da la scola populara. Per il diever da novs attestats en la scola populara dal Grischun datti differents motivs. Tant sin il stgalim da la scola primara sco er sin il stgalim superiur èn vegnids introducids novs roms en il passà (instrucziun d'ina segunda lingua sco er l'obligatori da frequentar il rom «informatica» sin il stgalim superiur). D'aggiuntar è ina refurma dal stgalim superiur da la scola populara cun differents models che stattan a disposiziun e che ston esser preschents en ils attestats. In ulteriur motiv per concepir da nov ils attestats è quel che sin il formular d'attestat èsi da metter a disposiziun sufficientamain spazi per in giudicament cumples-

siv da las scolaras e dals scolar. In giudicament cumplessiv cumpiglia ultra da las enonuschientschas generalas er criteris sco cumportament social, d'emprender e da lavurar. Ils novs attestats èn da gronda impurtanza er per il project entschavì a las scolas grischunas «promover e giuditgar a moda cumplessiva (pgc)».

## Novs attestats en rumantsch grischun

Fin uss pudevan ins giuditgar las scolaras ed ils scolar tant cun attestats da notas sco er cun plets (attestat commentà). La spezialitad dal nov attestat è quella che cun il medem formular po vegnir fatg tant in attestat da notas sco er in uschenumrà attestat commentà. Il cussegl da scola decida, tgenina da las duas furmas che vegn applitgada en ina da las scolas. Sch'ins dovra ulteriuras decleraziuns davart ils progress d'emprender d'ina scolara resp. d'in scolar, alura po quai succeder cun in usche-

numrà rapport davart l'emprender. Quel è ina part fixa da l'attestat uffizial. Ils novs attestats vegnan edids per tudestg, talian e rumantsch grischun. Entant che las magistras ed ils magisters da scola primara pon tscherner tranter models stampads ed ina versiun electronica (DC), stat a disposiziun a las persunas d'instrucziun dal stgalim superiur da la scola populara be anc la varianta electronica per l'attestat. En il futur duai l'attestat daventar anc pli fitg in instrument da promoziun. El è la basa per discurs impurtants e dat la paisa principala a la promoziun da las singulas scolaras e dals singuls scolar. En quest senn duai vegnir pronunziada ina nunpromoziun be, sch'ella gida a promover l'uffant per tutgà.

Ils novs attestats na signifitgan betg ina midada radicala, mabain in'adattaziun necessaria al mintgadi da scola midà.



Ils attestats novs fruntan sin opposiziun tar la magistraglia.